

# Risalah Umrah *buat sahabat*

ج

Muhammad Aiman Ghazali Al-Payungi



Terbitan pertama edisi e-buku

Jun 2020

©Penerbitan Al-Jitrawi

Penulis:

Muhammad Aiman Ghazali Al-Payungi

Penyunting:

Muhammad Syazani Satri Al-Jitrawi



Pihak penerbit memohon ampun kepada Allah ﷻ dan maaf kepada sidang pembaca atas sebarang kelemahan yang terkandung di dalam tulisan ini. Sebarang pembetulan atau cadangan adalah dialu-alukan dan boleh dihantar ke alamat e-mel: [muhammadaljitrawiy@gmail.com](mailto:muhammadaljitrawiy@gmail.com)

## Isi Kandungan

<i>Jadual Transliterasi</i> .....	4
<i>Pendahuluan Penulis</i> .....	5
<b>Bab 1: Pengenalan `Umrah</b> .....	7
Definisi `Umrah .....	8
Hukum Mengerjakan `Umrah .....	8
Dalil Kefarduan .....	8
Kelebihan `Umrah .....	10
Waktu Perlaksanaan .....	10
Perkara Wajib `Umrah .....	10
Rukun-Rukun `Umrah .....	11
<b>Bab 2: Berniat Ihram</b> .....	12
Berniat Ihram Di Mīqāt .....	13
Lafaz Niat `Umrah .....	13
<b>Bab 3: Ṭawāf `Umrah</b> .....	16
Pengertian Ṭawāf .....	17
Lafaz Niat Ṭawāf .....	17
Syarat-Syarat Ṭawāf .....	17
Sunat-Sunat Ṭawāf .....	20
<b>Bab 4: Sa`ī `Umrah</b> .....	22
Pengertian Sa`ī .....	23
Lafaz Niat Sa`ī .....	23
Syarat-Syarat Sa`ī .....	23
Sunat-Sunat Sa`ī .....	24
<b>Bab 5: Bercukur Atau Bergunting</b> .....	25
<b>Bab 6: Larangan Ketika Berihrām</b> .....	27
Larangan Yang Dikhususkan Bagi Lelaki Sahaja .....	28
Larangan Yang Dikhususkan Bagi Wanita Sahaja .....	32
Larangan Umum (Lelaki Dan Wanita) .....	33
<b>Bab 7: Kesimpulan Pergerakan `Umrah</b> .....	42
<b>Bab 8: Ṭawāf Wadā`</b> .....	46
<i>Penutup</i> .....	50

## Jadual Transliterasi

Arab	Latin	Arab	Latin
أ\ء	'	ض	ḍ
ب	b	ط	ṭ
ت	t	ظ	ẓ
ث	th	ع	`
ج	j	غ	gh
ح	ḥ	ف	f
خ	kh	ق	q
د	d	ك	k
ذ	dh	ل	l
ر	r	م	m
ز	z	ن	n
س	s	هـ	h
ش	sh	و	w
ص	ṣ	ي	y

Vokal Panjang		Vokal Pendek	
آ	Ā/ā	اَ	a
و	Ū/ū	وُ	u
ي	Ī/ī	يَ	i

## Pendahuluan Penulis



بِسْمِ اللَّهِ الرَّحْمَنِ الرَّحِيمِ

الْحَمْدُ لِلَّهِ رَبِّ الْعَالَمِينَ، وَالصَّلَاةُ وَالسَّلَامُ عَلَى سَيِّدِنَا مُحَمَّدٍ وَآلِهِ وَصَحْبِهِ وَسَلَّمَ،  
أَمَّا بَعْدُ:

Tujuan penulisan ini dihasilkan adalah untuk membantu sahabat-sahabat sepengajian di Jordan untuk mengerjakan ibadah `umrah.

Penulisan ini membahaskan isu-isu `umrah secara ringkas agar semua lapisan masyarakat dapat memahaminya. Adapun masalah yang panjang-panjang, bolehlah dirujuk dalam kitab-kitab yang lebih besar. Adapun masalah-masalah yang dihimpunkan dalam risalah ini berdasarkan kitab-kitab fiqah Mazhab Al-Syāfi`i dan fatwa-fatwa yang dikeluarkan oleh Majlis Muzakarah Tabung Haji Kebangsaan.

Akhirnya, saya memohon maaf di atas segala kesilapan dan kekurangan yang berlaku. Semoga Allah تَعَالَى

memuliakan kita semua dengan menganugerahkan keikhlasan dalam segala perbuatan dan perkataan kita.



# **BAB 1:** **PENGENALAN `UMRAH**



## Definisi `Umrah

`Umrah dari segi bahasa bermaksud ziarah. Manakala dari segi syarak, bermaksud ziarah ke Baytullāh al-Ḥarām dengan cara-cara yang tertentu.

## Hukum Mengerjakan `Umrah

Menurut Mazhab al-Syāfi`ī, wajib sekali dalam seumur hidup jika sudah menepati syarat-syarat, dan ditunaikan dalam keadaan tenang (tidak tergesa-gesa<sup>1</sup>).

## Dalil Kefarduan

Firman Allah تعالى:

﴿وَاتِمُّوا الْحَجَّ وَالْعُمْرَةَ لِلَّهِ فَإِنْ أُحْصِرْتُمْ فَمَا اسْتَيْسَرَ مِنَ الْهَدْيِ وَلَا تَخْلُقُوا  
رُءُوسَكُمْ حَتَّى يَبْلُغَ الْهَدْيُ مَحَلَّهُ ۖ فَمَنْ كَانَ مِنْكُمْ مَرِيضًا أَوْ بِهِ أَذًى مِنْ رَأْسِهِ  
فَفِدْيَةٌ مِنْ صِيَامٍ أَوْ صَدَقَةٍ أَوْ نُسُكٍ فَإِذَا أَمِنْتُمْ فَمَنْ تَمَتَّعَ بِالْعُمْرَةِ إِلَى الْحَجِّ فَمَا  
اسْتَيْسَرَ مِنَ الْهَدْيِ ۚ فَمَنْ لَمْ يَجِدْ فَصِيَامُ ثَلَاثَةِ أَيَّامٍ ۚ فِي الْحَجِّ وَسَبْعَةٍ إِذَا رَجَعْتُمْ ۚ  
تِلْكَ عَشْرَةٌ كَامِلَةٌ ۚ ذَلِكَ لِمَنْ لَمْ يَكُنْ أَهْلُهُ حَاضِرِي الْمَسْجِدِ الْحَرَامِ وَاتَّقُوا اللَّهَ  
وَأَعْلَمُوا أَنَّ اللَّهَ شَدِيدُ الْعِقَابِ ۝﴾

<sup>1</sup> Kerana terdapat sebahagian mazhab mewajibkan melakukan `umrah dengan segera apabila mencukupi syarat dan haram menangguhkannya lagi. Berbeza dengan Mazhab Al-Syāfi`ī, dibenarkan untuk ditangguhkan.



Maksudnya: “Dan sempurnakanlah ibadah ḥajī dan `umrah kerana Allah. Tetapi jika kamu dikepung (oleh musuh), maka (sembelihlah) Hadyu (haiwan yang disembelih sebagai Dam) yang mudah didapati, dan jangan kamu mencukur kepalamu, sebelum Hadyu sampai di tempat penyembelihannya. Jika ada dalam kalangan kamu yang sakit atau mempunyai gangguan pada kepalanya (lalu dia bercukur), maka dia wajib membayar Fidyah, iaitu berpuasa, bersedekah, atau melakukan korban (Dam). Apabila kamu dalam keadaan yang aman, maka barang siapa mengerjakan `umrah sebelum ḥajī, dia(wajib menyembelih) Hadyu yang mudah didapati. Tetapi jika dia tidak mendapatkannya, maka dia (wajib) berpuasa tiga hari dalam (musim) ḥajī dan tujuh (hari) setelah dia kembali. Keseluruhannya berjumlah sepuluh (hari). Demikian itu, bagi orang yang bukan penduduk Masjid al-Ḥarām. Bertakwalah kepada Allah dan ketahuilah bahawa hukuman Allah sangat berat.”<sup>2</sup>

---

<sup>2</sup> Al-Baqarah, 196.

## Kelebihan `Umrah

Rasūlullāh ﷺ bersabda:

الْعُمْرَةُ إِلَى الْعُمْرَةِ كَفَّارَةٌ لِمَا بَيْنَهُمَا

Maksudnya: “Satu `umrah ke `umrah lainnya merupakan penghapus dosa di antara keduanya.”<sup>3</sup>

## Waktu Perlaksanaan

Harus pada bila-bila masa.

## Perkara Wajib `Umrah

1. Ihrām di Mīqāt (Mīqāt Makānī seperti ḥajī) dan sesiapa yang terlepas untuk ihrām di Mīqāt Makānī, maka perlulah dia kembali ke tempat Mīqāt dan ihrām di sana atau wajib ke atasnya Fidyah (sembelih seekor kambing) sekiranya ia mengerjakan perbuatan `umrah tanpa kembali ke mīqātnya, sekiranya ia kembali semula kepada mīqāt sebelum mengerjakan perbuatan `umrah, maka tidak wajib Fidyah ke atasnya.

---

<sup>3</sup> *Saḥīḥ Al-Bukhārī*, 1773.

**Faedah:** Jika para jemaah berkehendak untuk melakukan `umrah kali kedua untuk dirinya atau untuk orang lain, maka perlulah dia keluar ke Mīqāt Makānī bagi orang Makkah, yakni Tanah Ḥalāl di Makkah. Mīqāt Makānī yang terdekat ialah Tan`īm. Maka, bagi para jemaah yang ingin niat iḥrām, maka berniatlah di sana.

2. Menjauhi perkara-perkara yang diharamkan ketika iḥrām (sama seperti ḥajī).

### **Rukun-Rukun `Umrah**

1. Iḥrām: Perlulah dia berniat iḥrām ketika menuju ke Baytullāh al-Ḥarām untuk melaksanakan ibadah `umrah.
2. Ṭawāf: Iaitu ṭawāf di Ka`bah tujuh kali pusingan mengelilingi Ka`bah dalam keadaan dia bersuci.
3. Sa`ī: Iaitu antara Ṣafā dan Marwah dan disunatkan suci ketika melakukannya.
4. Bercukur atau bergunting: Yang perlu sekurang-kurangnya tiga helai rambut dan merupakan salah satu rukun. Menurut pendapat muktamad, bercukur dan bergunting merupakan salah satu rukun dari rukun-rukun `umrah.
5. Tertib pada kesemua rukun.



## **BAB 2: BERNIAT IHRĀM**



## **Berniat Iḥrām Di Mīqāt**

Seseorang yang ingin mengerjakan `umrah mestilah beriḥrām di tempat-tempat yang sudah ditetapkan oleh syarak, iaitu dipanggil tempat bermīqāt.

Tempat bermīqāt bagi ahli Makkah ialah di luar Tanah Ḥarām, yakni pada Tanah Ḥalāl. Dan yang paling afdal adalah ia bermīqāt di Ji`rānah, kemudian di Tan`im, kemudian di Ḥudaybiah. Kemudian bagi orang yang datang dari luar Makkah, terdapat beberapa tempat yang ditetapkan iaitu:

- i. Juhfah: Mīqāt untuk orang daripada Mesir, utara Afrika, dan Turki.
- ii. Dhū al-Ḥulayfah: Mīqāt untuk orang yang datang dari Madīnah. Kini dikenali sebagai Bi'r `Alī.
- iii. Yalamlam: Mīqāt ahli Yaman.
- iv. Qarn al-Manāzil: Mīqāt orang timur (Najd).
- v. Dhātu `Irqin: Mīqāt ahli Iraq.

## **Lafaz Niat `Umrah**

نَوَيْتُ الْعُمْرَةَ وَأَحْرَمْتُ بِهَا لِلَّهِ تَعَالَى

Maksudnya: “Sahaja aku berniat `umrah dan berihrām dengannya kerana Allah تَعَالَى.”

**Faedah:**

1. Bagi jemaah yang masuk ke Makkah melalui Malaysia, wajib berniat iḥrām sebelum pesawat melepasi Mīqāt Qarn al-Manāzil.
2. Wanita dalam keadaan haid tidak dihalang daripada berniat `umrah.
3. Bagi wanita yang sedang suci dan menjangkakan haidnya akan tiba selepas berniat iḥrām, digalakkan berniat secara bersyarat untuk mengelakkan timbulnya masalah, terutamanya jika tidak dapat menyempurnakan kerja-kerja `umrah sedangkan waktu untuk pulang ke tanah air sudah hampir, dan haidnya masih belum kering. Lafaz niat `umrah secara bersyarat seperti berikut:

“Sahaja aku berniat `umrah dan berihrām dengannya kerana Allah تَعَالَى, sekiranya aku didatangi haid maka aku menjadi halal.”

Apabila datangnya haid, maka dia secara automatik terlepaslah dirinya daripada pantang larang iḥrām dan dia juga tidak terikat dengan kerja-kerja `umrah lagi.

4. Wanita yang sedang suci dan khuatir kedatangan haid yang akan menyebabkan berlaku gangguan dalam

perjalanan kerja-kerja `umrahnya, dibolehkan memakan pil penahan haid, tetapi setelah mendapat nasihat daripada doktor wanita yang dipercayai.



**BAB 3:**  
**ṬAWĀF `UMRAH**





## Pengertian Ṭawāf

Maksud ṭawāf ialah mengelilingi Ka`bah dengan syarat-syaratnya.

Apabila jemaah melihat Ka`bah, maka sunat membaca doanya.

## Lafaz Niat Ṭawāf

Lafaz niat ṭawāf `umrah sebelum memulakan ṭawāf `umrah:

اللَّهُمَّ إِنِّي أُرِيدُ طَوَافَ بَيْتِكَ الْحَرَامِ سَبْعَةَ أَشْوَاطٍ طَوَافَ  
الْعُمْرَةِ لِلَّهِ تَعَالَى

Maksudnya: “Sahaja aku ṭawāf Baytullāh al-Ḥarām tujuh keliling ṭawāf `umrah kerana Allah تَعَالَى.”

## Syarat-Syarat Ṭawāf


1. Suci daripada hadas besar dan kecil;
  - i. Disyaratkan mengambil wuḍū' sebelum melakukan ṭawāf.
  - ii. Jika berlaku sentuhan kulit ketika ṭawāf dengan lelaki/wanita Ajnabī (asing), maka boleh berpegang

kepada pendapat lemah Mazhab Al-Syāfi`ī yang mengatakan terbatal wuḍū' apabila bersentuh kulit antara lelaki dan perempuan, maka terbatal wuḍū' yang menyentuh, bukan yang terkena sentuhan.

iii. Bagi wanita dalam haid, dia perlu tunggu sampai haidnya kering. Seterusnya mandi wajib, ambil wuḍū', kemudiannya barulah dia boleh melakukan ṭawāf.

2. Suci daripada najis pada pakaian, badan, dan tempat ṭawāf.
3. Menutup aurat sebagaimana di dalam solat.
4. Ṭawāf hendaklah dimulakan pada sudut Ḥajar al-Aswad.
5. Sewaktu berjalan melakukan ṭawāf, Baytullāh hendaklah sentiasa berada di sebelah kiri bahu; jika ditolak akibat kesesakan ketika ṭawāf sehingga bahunya lari sedikit daripada bangunan Ka`bah, maka hendaklah segera membetulkan bahunya itu menghala ke arah bangunan Ka`bah.
6. Berjalan itu dengan tujuan ṭawāf; jika terdapat orang yang berpisah daripada kumpulan atau pasangannya, lalu dia berjalan selepas itu bertujuan semata-mata untuk mencari kumpulan atau pasangannya, maka batal pusingan itu sahaja, bukan semua pusingan.
7. Cukup tujuh keliling dengan yakin;

- i. Jikalau was-was ketika ṭawāf pada bilangan pusingan ṭawāf, maka hendaklah mengambil jumlah yang terkecil. Contohnya, jika jemaah was-was antara enam pusingan atau tujuh pusingan, maka dikira masih enam pusingan, maka jemaah hendaklah mencukupkan satu lagi pusingan.
  - ii. Jikalau ṭawāf secara berkumpulan, maka hendaklah menggunakan keyakinan sendiri dalam menentukan pusingan ṭawāf, walaupun bercanggah dengan rakan sekumpulan.
8. Ṭawāf itu hendaklah dilakukan di dalam masjid dan di luar dari bahagian Ka`bah, seperti Ḥijr Ismā`il dan Shādhawān; semasa ṭawāf, tidak boleh menyentuh bangunan Ka`bah, kelambunya, Ḥijr Ismā`il dan Shādhawān.



## Sunat-Sunat Ṭawāf

1. Ṭawāf dengan berjalan kaki.
2. Beridṭibā` (memakai pakaian ihṛām dalam keadaan membuka bahu sebelah kanan) bagi lelaki sepanjang ṭawāf.
3. Berlari-lari anak bagi lelaki pada pusingan pertama, kedua, dan ketiga. Pada pusingan keempat sehingga ketujuh, jemaah lelaki berjalan seperti biasa.
4. Melakukan Istilām (sentuh) Ḥajar al-Aswad kemudian mengucupnya. Jika tidak mampu, disunatkan isyarat dengan tangan dari jauh sambil menyebut:

بِسْمِ اللَّهِ، اللَّهُ أَكْبَرُ

Maksudnya: “Dengan nama Allah, Allah Maha Besar.”

Kemudian, kucup tapak tangan tanpa membunyikan suara kucupan tersebut.

Begitu juga sunat Istilām (sentuh) Rukun Yamānī, tetapi tidak sunat mengucupnya. Jika tak mampu, disunatkan isyarat dengan tangan dari jauh tanpa kucup tapak tangan tersebut sambil menyebut:

بِسْمِ اللَّهِ، اللَّهُ أَكْبَرُ

Maksudnya: “Dengan nama Allah, Allah Maha Besar.”

**Perhatian:** Hanya dinasihatkan melakukan isyarat sahaja pada dua tempat ini. Jika mahu mengucup Ḥajar al-Aswad, pastikan ia dilakukan di luar masa ṭawāf.

5. Membaca doa dan wirid.
6. Berturut-turut tujuh pusingan ṭawāf tersebut. Kalau penat, boleh berhenti dan sambung semula pada tempat berhenti tadi. Yang afdalnya, sambung pada penjuru Ḥajar al-Aswad.
7. Ṭawāf dengan tawāḍu' dan khusyuk.
8. Melakukan solat sunat dua rakaat setelah selesai ṭawāf di belakang Maqām Ibrāhīm.



**BAB 4:**  
**SA'Ī `UMRAH**



## Pengertian Sa`i

Berjalan ulang-alik antara bukit Şafā dengan Marwah.

## Lafaz Niat Sa`i

Lafaz niat sa`i `umrah sebelum memulakan sa`i ketika berada di atas bukit Şafā:

اللَّهُمَّ إِنِّي أُرِيدُ أَنْ أَسْعَى بَيْنَ الصَّفَا وَالْمَرْوَةِ الْعُمْرَةَ لِلَّهِ تَعَالَى

Maksudnya: “Sahaja aku sa`i `umrah antara Şafā dan Marwah tujuh keliling kerana Allah تَعَالَى.”

## Syarat-Syarat Sa`i

1. Hendaklah dilakukan selepas melakukan ṭawāf.
2. Mulai daripada bukit Şafā dan disudahi di bukit Marwah.
3. Cukup tujuh kali dengan yakin, iaitu dikira dari Şafā ke Marwah sekali dan dari Marwah ke Şafā sekali.
4. Hendaklah sa`i sehingga sampai ke penghujung tempat sa`i di bukit Şafā dan bukit Marwah pada tiap-tiap kali.
5. Hendaklah sa`i di tempat yang ditentukan sekarang.
6. Mengekalkan niat untuk bersa`i sepanjang masa melakukan sa`i itu.

## Sunat-Sunat Sa`ī

1. Keluar ke tempat sa`ī melalui pintu Şafā.
2. Menaiki bukit Şafā dan Marwah hingga sampai ke batu-batu bukit.

Menghadap ke arah kiblat dan mengangkat kedua-dua belah tangan setiap kali berada di atas bukit Şafā dan Marwah sambil mengucapkan:

لَا إِلَهَ إِلَّا اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، وَلِلَّهِ الْحَمْدُ

Maksudnya: “Allah Maha Besar, Allah Maha Besar, Allah Maha Besar, segala puji hanya kepada Allah.”

3. Berlari-lari anak bagi lelaki (tidak bagi wanita) apabila sampai di suatu tempat yang bertanda dengan lampu hijau.
4. Berturut-turut (Muwālāt) antara pusingan sa`ī.
5. Suci daripada hadas besar dan kecil serta menutup aurat.
6. Berjalan kecuali uzur. Maka boleh menggunakan kenderaan seperti kerusi roda.
7. Berdoa.





## **BAB 5:** **BERCUKUR ATAU BERGUNTING**



## **Bercukur Atau Bergunting**

Selepas selesai melakukan sa'ī, maka sampailah masanya bagi jemaah untuk bergunting atau bercukur bagi melepaskan dirinya daripada pantang larang iḥrām (Taḥallul). Afdal bercukur atau bergunting di Marwah.

Afdal bercukur kesemua sekali bagi lelaki, dan bagi wanita bergunting sahaja. Bagi yang botak licin, sunat baginya melakukan mata pisau di atas kepalanya.

Sunat bergunting (jika memilih untuk bergunting) sekurang-kurangnya tiga helai rambut sepanjang kadar ruas jari kuku pada hujung mana-mana rambut yang digunting. Jika kurang daripada saiz itu, masih dibolehkan.

Boleh menggunting rambut orang lain walaupun diri sendiri belum lagi bergunting. Namun, yang afdalnya gunting rambut sendiri terlebih dahulu, kemudian barulah menggunting rambut orang lain.

Dengan melakukan guntingan/cukuran ini, maka terlepaslah jemaah daripada segala pantang larang dalam iḥrām `umrah.



**BAB 6:**  
**LARANGAN KETIKA BERIḤRĀM**



## **Larangan Ketika Berihram**

Secara umumnya, pantang larang dalam ihram `umrah boleh dibahagikan kepada tiga kategori:

1. Larangan yang dikhususkan bagi lelaki sahaja.
2. Larangan yang dikhususkan bagi wanita sahaja.
3. Larangan umum (lelaki dan wanita).

## **Larangan Yang Dikhususkan Bagi Lelaki Sahaja**

1. Memakai pakaian bersarung/berjahit/bercantum seperti seluar, baju kemeja, stokin, kasut yang menutup jari-jari kaki dan tumit, kain pelikat, dan sebagainya.
  - i. Seorang lelaki semasa dalam ihram haji atau `umrah diharuskan melakukan perkara-perkara berikut tanpa wajib menyempurnakan Dam:
    - a) Memakai kain pelikat dengan cara tidak disarungkan, walaupun kain pelikat tersebut bercantum antara dua penjurunya.
    - b) Memakai kain tuala.
    - c) Memakai kain pelikat lepas yang tidak bercantum antara dua penjurunya walaupun ada corak, berwarna-warni dan berbunga-bunga.
    - d) Memakai tali pinggang, cincin, dan kaca mata.

- e) Memakai sepatu yang menampakkan jari-jari kaki dan mempunyai tali pengikat di atas tulang kering yang menampakkan tumit.
  - f) Menutup kaki dengan kain iḥrām.
  - g) Menyemat pin antara dua hujung penjuru kain iḥrām sebelah bawah, tetapi tidak dibenarkan bagi kain iḥrām di sebelah atas.
  - h) Bercawat dengan kain iḥrām yang tidak bersambung dan berjahit.
  - i) Memakai lampin pakai buang bagi yang berpenyakit kencing tidak lawas.
- ii. Jika sekiranya seorang lelaki yang berada dalam iḥrām `umrah memakai pakaian yang dilarang dalam kategori ini secara terlupa atau tidak sengaja, hendaklah dia menanggalkan pakaian tersebut dengan segera apabila dia ingat atau diberi ingat.

**Perhatian:** Dia tidak berdosa dan tidak dikenakan Dam, tetapi jika dia melengah-lengahkan dalam keadaan dia mampu berbuat demikian, maka dia berdosa dan dikenakan Dam (Takhyīr dan Taqdīr).

### **Faedah:**

Dam Takhyīr dan Taqdīr boleh dipilih antara tiga perkara berikut:

- a) Menyembelih seekor kambing di Tanah Ḥarām Makkah yang sah dibuat korban, atau;
  - b) Bersedekah kepada enam orang fakir miskin di Tanah Ḥarām Makkah. Setiap seorang dua cupak makanan asasi Makkah, atau;
  - c) Berpuasa tiga hari.
- iii. Seorang lelaki yang berada dalam iḥrām ḥajī atau `umrah boleh memakai pakaian yang dilarang dalam kategori ini jika ada keperluan. Dia tidak berdosa akan tetapi diwajibkan ke atasnya membayar Dam (Takhyīr dan Taqdīr). Contohnya:
- a) Memakai sarung lutut (*knee guard*) yang dipakai secara bersarung untuk melegakan sakit lutut. Jika dipakai *bandage* secara dililit, kemudiannya disemat dengan pin atau *strap on*, tidak mengapa dan tidak dikenakan Dam.
  - b) Memakai kasut pada kaki yang sihat untuk mengimbangi kasut yang dipakai pada kaki palsu.

2. Menutup kepala atau sebahagian daripadanya seperti songkok, kopiah, serban, kain iḥrām dan sebagainya.
- i. Seorang lelaki semasa dalam iḥrām ḥajī atau `umrah diharuskan melakukan perkara-perkara berikut tanpa wajib menyempurnkan Dam:
    - a) Menggunakan payung.
    - b) Berteduh di bawah pokok.
    - c) Berteduh di bawah khemah.
  - ii. Jika sekiranya seorang lelaki yang berada di dalam iḥrām `umrah memakai pakaian yang dilarang dalam kategori ini secara terlupa atau tidak sengaja, hendaklah dia menanggalkan pakaian tersebut dengan segera apabila dia ingat atau diberi ingat.

**Perhatian:** Dia tidak berdosa dan tidak dikenakan Dam, tetapi jika dia melengah-lengahkan dalam keadaan dia mampu berbuat demikian, maka dia berdosa dan dikenakan Dam (Takhyīr dan Taqdīr).

## Larangan Yang Dikhususkan Bagi Wanita Sahaja

### 1. Menutup muka.

- i. Jika sekiranya seorang wanita yang berada dalam iḥrām ḥajī atau `umrah menutup mukanya dengan kain tudung secara lupa atau tidak sengaja, hendaklah dia menanggalkan pakaian tersebut daripada mukanya dengan segera apabila dia ingat atau diberi ingat.

Dia tidak berdosa dan tidak dikenakan Dam, tetapi jika dia melengah-lengahkan dalam keadaan dia mampu berbuat demikian, maka dia berdosa dan dikenakan Dam (Takhyīr dan Taqdīr).

- ii. Seorang wanita yang berada dalam iḥrām ḥajī atau `umrah dibenarkan memakai penutup hidung atau mulut (*mask*) kerana sesuatu keperluan.

**Perhatian:** Akan tetapi, dia diwajibkan menyempurnakan Dam (Takhyīr dan Taqdīr) dan dia tidak berdosa.

- iii. Seorang wanita yang berada dalam iḥrām `umrah boleh menutup muka dan hidungnya dengan tangan untuk mengelakkan habuk daripada masuk ke dalam hidung dan mulutnya itu tanpa wajib menyempurnakan Dam.



- iv. Orang lelaki dibolehkan menutup mukanya semasa dalam iḥrām `umrah kerana larangan ini hanya dikhususkan bagi wanita sahaja.

### **Larangan Umum (Lelaki Dan Wanita)**

1. Memakai sarung tangan.

Boleh melindungi tangan di sebalik kain tudung atau kain iḥrām.

2. Memakai bau-bauan sama ada di badan, makanan, minuman, atau menghidunya ke dalam hidung.

i. Seseorang yang berada dalam iḥrām `umrah boleh menggunakan:

- a) Ubat gigi, sabun mandi, dan syampu.
- b) Minyak angin.

**Perhatian:** Walaupun bahan-bahan ini berbau wangi. Ini kerana penggunaannya adalah atas niat kebersihan, bukannya untuk berwangi-wangian. Namun, yang terbaik adalah ditinggalkan kerana keluar daripada khilaf.

ii. Begitu juga dia boleh makan kek yang berperisa vanilla dan minum air kotak teh wangi, kerana bahan pewangi

yang digunakan itu adalah untuk menyedapkan makanan atau minuman tersebut sahaja, bukannya untuk berwangi-wangian.

- iii. Jika sekiranya seseorang yang berada dalam iḥrām `umrah memakai atau menghidu bau-bauan wangi secara terlupa atau tidak sengaja, hendaklah dia menghilangkan kesan bau-bauan tersebut dengan segera apabila dia ingat atau diberi ingat.

**Perhatian:** Dia tidak berdosa dan tidak dikenakan Dam, tetapi jika dia melengah-lengahkan dalam keadaan dia mampu berbuat demikian, maka dia berdosa dan dikenakan Dam (Takhyīr dan Taqdīr).

- iv. Jika seseorang yang sedang berada dalam iḥrām ḥajī atau `umrah dicalit atau disembur dengan minyak wangi pada badan atau pakaiannya tanpa kerelaannya, hendaklah dia menghilangkan kesan bau-bauan tersebut dengan segera.

**Perhatian:** Dia tidak berdosa dan tidak dikenakan Dam, tetapi jika dia melengah-lengahkan dalam keadaan dia mampu berbuat demikian, maka dia berdosa dan dikenakan Dam (Takhyīr dan Taqdīr).

- v. Seseorang yang berada dalam iḥrām `umrah hendaklah berhati-hati ketika mengucup Ḥajar al-Aswad. Ini kerana ditakuti Ḥajar al-Aswad dilumur dengan minyak wangi. Jika diketahui ianya dilumur dengan minyak wangi, haram ke atasnya mengucup Ḥajar al-Aswad itu. Jika dia mengucup Ḥajar al-Aswad dalam keadaan tidak mengetahui ia dilumur dengan minyak wangi, hendaklah dia menghilangkan kesan bau wangi tersebut dengan segera. Dia tidak berdosa dan tidak wajib menyempurnakan Dam.

Jika dia tidak menghilangkan kesan bau wangi tersebut dengan segera, dia dikira berdosa dan dikenakan Dam (Takhyīr dan Taqdīr).

- vi. Memakai semula kain iḥrām yang disapu dengan minyak wangi setelah ia ditanggalkan daripada badan adalah haram dan dikenakan Dam (Takhyīr dan Taqdīr).
- vii. Kelambu Ka`bah juga dilumur dengan minyak wangi.

**Perhatian:** Jemaah yang berada dalam iḥrām ḥajī atau `umrah hendaklah berhati-hati ketika merapatkan tubuh ke dinding Ka`bah supaya tidak terlibat menikmati bau wangi tersebut. Dia hendaklah

bersegera menjauhkan diri jika menghidu bau wangi. Dia tidak berdosa dan tidak dikenakan Dam. Jika dia tidak bersegera menjauhkan dirinya daripada kelambu Ka`bah yang wangi itu dengan segera, dia dikira berdosa dan wajib menyempurnakan Dam (Takhyīr dan Taqdīr).

viii. Wanita yang memakai tuala wangian (herba sahaja) adalah tidak berdosa dan tidak dikenakan Dam kerana tujuan pemakaiannya adalah untuk kesihatan, bukannya untuk berwangi-wangi.

3. Memakai minyak di kepala, janggut, dan semua bulu-bulu muka selain daripada yang tumbuh di pipi dan di dahi.

i. Jika sekiranya seseorang yang berada dalam ihram `umrah memakai minyak pada bahagian tubuh yang tidak dibenarkan secara terlupa atau tidak sengaja, hendaklah dia menghilangkan kesan minyak tersebut dengan segera apabila dia ingat atau sedar atau diberi ingat.

**Perhatian:** Dia tidak berdosa dan tidak dikenakan Dam. Jika dia melengah-lengahkan dalam keadaan dia

mampu berbuat demikian, maka dia berdosa dan dikenakan Dam (Takhyīr dan Taqdīr).

- ii. Memakai losyen pelindung sinaran atau sinaran ultra ungu dibolehkan dengan syarat losyen tersebut tiada wangian.

Walaupun begitu, jemaah dinasihatkan berhati-hati supaya tidak menggunakan losyen tersebut untuk kecantikan. Niatkan untuk kesihatan.

#### 4. Menanggalkan rambut atau bulu daripada mana-mana anggota badan.

- i. Jika sekiranya seorang yang berada dalam iḥrām `umrah menanggalkan rambut atau bulu secara sengaja, tidak sengaja, atau terlupa, dia tetap dikenakan Dam (Takhyīr dan Taqdīr).

**Perhatian:** Tidak berdosa jika perkara ini berlaku secara tidak sengaja atau terlupa, tetapi berdosa jika dengan sengaja.

- ii. Jika seseorang yang berada dalam iḥrām `umrah menggugurkan rambutnya dengan cara menggosok-gosok rambutnya ketika mandi atau mengambil air

wuḍū' (walaupun rambutnya jenis mudah gugur), dia tetap wajib menyempurnakan Dam tetapi tidak berdosa.

**Masalah:** Jika rambut tersebut gugur dengan sendiri, maka tidak dikenakan Dam.

- iii. Tidak dikenakan Dam ke atas orang yang berada dalam iḥrām `umrah yang mendapati rambut atau bulu yang gugur atas tilam atau bantal ketika bangun daripada tidur.

Begitu juga keadaannya bagi wanita yang mendapati rambut-rambut yang tertinggal dalam serkup tudung kepalanya ketika dia menanggalkan serkup kepala tersebut.

## 5. Mengerat atau memotong kuku.

- i. Jika sekiranya seorang yang berada dalam iḥrām `umrah mengerat atau memotong kuku secara sengaja, tidak sengaja, atau terlupa, dia tetap dikenakan Dam (Takhyīr dan Taqdīr).

**Perhatian:** Tidak berdosa jika perkara ini berlaku secara tidak sengaja atau terlupa. Tetapi berdosa jika dengan sengaja.

- ii. Jika kuku tertanggal sendiri, maka tidak dikenakan Dam.
  - iii. Boleh mencabut kuku yang mengganggu keadaan jika sekiranya ia tidak dicabut, tanpa dikenakan Dam. Contohnya, kuku yang pecah akibat jari terkepit dengan sesuatu.
  - iv. Harus mencabut kulit bibir, kaki, dan tangan yang mengelupas tanpa dikenakan Dam.
6. Memotong, menebang, mengerat, atau mencabut pokok-pokok di Tanah Ḥarām Makkah.

**Perhatian:** Pengharaman memotong, menebang, mengerat, atau mencabut pokok-pokok di Tanah Ḥarām adalah berkaitan dengan pantang larang yang tidak boleh dilakukan dalam Tanah Ḥarām itu sendiri, bukannya berkaitan dengan keadaan seseorang itu berada dalam iḥrām ḥajī atau `umrah.

7. Memburu binatang buruan darat yang halal dimakan atau membinasakannya di Tanah Ḥalāl atau Tanah Ḥarām.
- i. Menangkap ikan yang hidup sama ada dalam kolam, sungai, atau laut tidak termasuk dalam larangan ini.

- ii. Jika seseorang memijak seekor belalang hingga mati, walaupun secara tidak sengaja, dia tetap wajib menyempurnakan Dam menurut nilai belalang tersebut.
- iii. Seseorang itu diharuskan membunuh nyamuk, lalat, dan labah-labah jika serangga-serangga tersebut mengganggu tanpa dikenakan Dam.
- iv. Binatang buruan yang dimiliki di Tanah Ḥalāl seperti burung tekukur, burung merpati, kijang, rusa, arnab, dan sebagainya wajib dilepaskan menurut pendapat muktamad Mazhab Syāfi'ī. Tetapi pendapat kebanyakan ahli fiqah, tidak wajib dilepaskan sekiranya binatang-binatang itu tidak ada bersamanya sewaktu berihṛām.

#### 8. Melakukan pendahuluan persetubuhan.

- i. Tidak dikenakan Dam ke atas orang yang berada dalam ihṛām ḥajī atau `umrah yang keluar air maninya akibat melihat wanita atau menyentuhnya atau dilamun khayal.
- ii. Suami isteri yang berada dalam ihṛām ḥajī atau `umrah boleh berpimpin tangan ketika melintas jalan.



- iii. Tidak salah seorang suami atau isteri memeluk pasangannya yang sakit jika pelukan itu adalah pelukan kasih sayang, bukannya pelukan bersyahwat.

9. Bersetubuh.

10. Berkahwin, atau mengahwinkan, atau menerima wakil kahwin.



**BAB 7:**  
**KESIMPULAN PERGERAKAN**  
**`UMRAH**



## Kesimpulan Pergerakan `Umrah

1. Pertama sekali, perlulah mandi (sunat). Jika dia tidak mampu, maka bertayammumlah.
2. Kemudian bagi lelaki, perlulah dia bebas daripada memakai pakaian yang berjahit dan hanya memakai Ridā' dan Izār, dan tidak memakai kasut yang menutupi buku lali (wajib). Manakala bagi wanita, diharamkan baginya mengenakan pakaian yang menutupi muka dan tapak tangan.

Disunatkan bagi para jemaah untuk solat sunat dua rakaat pada waktu yang bukan makruh, dan disunatkan juga untuk membaca pada rakaat pertama selepas Al-Fātiḥah, surah Al-Kāfirūn, dan pada rakaat kedua selepas Al-Fātiḥah, surah Al-Ikhlāṣ.

3. Ihṛām beserta niat (rukun) di Mīqāt Makānī (wajib), beserta talbiah sehingga para jemaah melihat Ka'bah (sunat).

**Faedah:** Disunatkan untuk meninggikan suara ketika bertalbiah, sama ada ketika menaiki kenderaan, mendaki bukit, atau menuruni bukit, dan juga pertukaran keadaan

siang dan malam. Disunatkan untuk meninggikan suara bagi lelaki. Manakala bagi perempuan, perlu memperlahankan suaranya.

Lafaz talbiah:

لَبَّيْكَ اللَّهُمَّ لَبَّيْكَ، لَبَّيْكَ لَا شَرِيكَ لَكَ لَبَّيْكَ، إِنَّ الْحَمْدَ وَالنِّعْمَةَ  
لَكَ وَالْمُلْكَ، لَا شَرِيكَ لَكَ

Maksudnya: “Aku datang memenuhi panggilan-Mu ya Allah, aku datang memenuhi panggilan-Mu Tuhan yang tiada sekutu bagi-Mu, aku datang memenuhi panggilan-Mu. Sesungguhnya segala puji, nikmat, dan segenap kekuasaan adalah milik-Mu, Tuhan yang tiada sekutu bagi-Mu.”

4. Ṭawāf sekitar Ka`bah sebanyak tujuh kali pusingan dan dalam keadaan suci (rukun) yang dimulai dengan Ḥajar al-Aswad, dan disunatkan menyentuh Ḥajar al-Aswad dan mengucupnya atau isyarat dengan tangan di Rukun Yamānī dan berdoa ketika berada di situ.

5. Solat sunat dua rakaat di belakang Maqām Ibrāhīm عَلَيْهِ السَّلَام (sunat) dan disunatkan juga untuk membaca pada

rakaat pertama selepas Al-Fātiḥah, surah Al-Kāfirūn, dan pada rakaat kedua selepas Al-Fātiḥah, surah Al-Ikhlāṣ.

6. Sa`ī antara Ṣafā dan Marwah (rukun).

7. Bercukur atau bergunting ketika di Marwah atau di mana-mana tempat (rukun).

Selepas itu, para jemaah bertahallul daripada iḥrām maka berakhirlah `umrahnya.



**BAB 8:**  
**ṬAWĀF WADĀʿ**



## Ṭawāf Wadā`

Mengikut Mazhab al-Syāfi`ī, ṭawāf Wadā` (selamat tinggal) adalah wajib bagi orang yang ingin kembali ke kampung halaman atau keluar dari kota Makkah melebihi dua Marhalah sebelum memulakan perjalanan meninggalkan kota suci Makkah, jemaah wajib melakukan ṭawāf Wadā` dengan mengikuti syarat-syarat dan sunat-sunat ṭawāf yang telah disebutkan sebelum ini.

Niatnya:

اللَّهُمَّ إِنِّي أُرِيدُ طَوَافَ بَيْتِكَ الْحَرَامِ سَبْعَةَ أَشْوَاطٍ طَوَافَ  
الْوَدَاعِ لِلَّهِ تَعَالَى

“Sahaja aku ṭawāf Baytullāh al-Ḥarām tujuh keliling ṭawāf Wadā` kerana Allah تَعَالَى.”

Ṭawāf Wadā` ini dilakukan selepas segala persiapan untuk pulang ke tanah air sudah dilakukan seperti beg-beg sudah dikemaskan, urusan membeli-belah sudah selesai, dan pelbagai lagi urusan.

Wanita dalam haid dikecualikan daripada melakukan ṭawāf Wadā` ini. Cara yang sunat baginya untuk meninggalkan kota Makkah ialah pergi ke hadapan pintu

Masjid al-Ḥarām, memandang Ka`bah dan melambai-lambai tangan dengan perasaan yang sayu.

Melakukan ṭawāf Wadā` ini terdapat sedikit perbezaan dengan ṭawāf `umrah, iaitu:

- i. Memakai pakaian biasa dengan menutup aurat. Bukan memakai kain iḥrām.
- ii. Tidak melakukan idṭibā` (membuka bahu sebelah kanan) bagi lelaki sebab jemaah memakai pakaian biasa.
- iii. Tiada perbuatan berlari-lari anak bagi lelaki pada pusingan pertama, kedua, dan ketiga.

**Masalah:** Jika wanita yang sedang berada dalam keadaan haid berniat iḥrām `umrah, tetapi dia masih tidak dapat menyempurnakan kerja `umrah kerana haid masih ada sehinggalah sampai waktu berangkat pulang, maka dia perlu bertahallul Iḥṣār untuk melepaskan dirinya daripada pantang larang iḥrām. Caranya:

1. Hendaklah menyembelih seekor kambing yang sah dibuat korban dan bergunting dengan niat Tahallul.
2. Daging kambing tersebut diagih-agihkan kepada fakir miskin tempatan (kota Makkah).



Dengan ini, terlepaslah dirinya daripada segala pantang larang iḥrām.

Jika `umrah tersebut `umrah wajib, maka wajib Qaḍā'. Jika `umrah tersebut `umrah sunat, tak wajib Qaḍā'.

## Penutup



الْحَمْدُ لِلَّهِ الَّذِي بِنِعْمَتِهِ تَمَّ الصَّالِحَاتُ

Telah selesai risalah yang begitu ringkas ini dengan taufik dan hidayah dari Allah تَعَالَى.

Semoga ianya bermanfaat buat sekalian yang membacanya. Sekiranya terdapat kesilapan, saya dengan merendah diri memohon teguran dari semua.

وَاللَّهُ أَعْلَمُ

وَصَلَّى اللَّهُ عَلَى سَيِّدِنَا مُحَمَّدٍ، وَعَلَى آلِهِ وَصَحْبِهِ وَسَلَّمَ، وَالْحَمْدُ لِلَّهِ رَبِّ الْعَالَمِينَ

*Muhammad Aiman Ghazali Al-Payungi*

14 Januari 2020.